

東
華
續
錄

東華續錄

同治四十二

臣王先謙敬編

臣張式恭恭校

同治四年乙丑春正月丁酉朔元旦節停止筵宴○諭議政王軍機大臣等張集馨奏攻破積年逆巢大獲全勝一摺靜門州高家堡久爲逆回盤踞經張集馨與曹克忠會同進剿當將高家堡攻克敗賊分竄蕭河城青家驛另股賊匪在西路十字堡等處屯聚復經官軍進剿殲匪甚眾辦理尙爲得手前諭都興阿等將曹克忠一軍應否移紮靜甯適中之地爲陶茂林後路聲援妥籌調派曹克忠見欲進攻蕭河城應如何節節進逼力圖埽蕩之處仍著都興阿穆圖善雷正綰妥爲調度張集馨見擬帶隊進省卽著趕緊前進與陶茂林恩麟會籌布置以固省防陶茂林一軍紮營甘

草店一帶該提督務當嚴密守禦毋得稍有疏虞獲賊供稱該逆因官軍圍攻固原甚緊屢遣馬百齡兄弟馬彭齡赴雷營捏詞詐降未見聽信曹軍已到靜甯我等家屬皆在蕭河城等處若被攻擊必致受害是以調齊馬步各逆由靜甯入隆德過山卽是瓦亭使雷營腹背受敵如不得手卽由涇平回陝孫義寶仍在固原與雷營抗拒使彼不疑等語固原逆謀甚狡該匪如赴雷正綰軍營乞降該署提督不可墮其詭計致誤戎機逆匪既有使雷營腹背受敵之說雷正綰尤當加意備禦毋爲所乘靜甯各軍每日需麵二萬餘斤前存四十萬斤爲該州黃松年別項支銷此時顆粒無存軍士數日不得一飽雷正綰各營軍糧亦極短絀黃松年概置不問該州於此項麵斤任意支銷實屬不知緩急有無侵那情弊著恩麟查明參奏各軍無從覓食困苦異常均有停兵待餉之虞

著恩麟設法接濟毋令缺乏是爲至要將此由六百里諭知都興
阿穆圖善雷正綰並傳諭陶茂林恩麟張集馨知之尋奏遵查黃
松年精神委頓於兵勇應支口食率多貽誤實屬衰庸不職應請
革職從之○諭廣鳳奎昌奏探聞古城漢城失守見籌豫防布置
一摺古城防剿喫緊經廣鳳等揀派蒙古兵一千五百名前往助
剿旋於十一月十七日探聞古城漢城失守滿城附近見有漢回
及鐘頭回逆約萬餘人盤踞北套橋子地方由科至古道路梗塞
覽奏曷勝憤懣逆回勢甚鴟張古城漢城見已失陷滿城刻下情
形若何未據保恆等奏報由科至古文報不通著廣鳳奎昌設法
繞道偵探迅卽知照保恆惠慶督飭在城兵勇慎密防範以待援
帥廣鳳等仍當將科境要隘嚴密布置相機籌辦並著知會巴里
坤哈密等城一體嚴防奔突毋得專待關內之兵以致緩不濟急

坐失事機該逆聞軍餉不日到科意圖東竄攻撲科城其謀甚屬兇狡前據德勒克多爾濟奏稱山西撥解新疆餉銀兩次共十餘萬已由綏遠城轉解科布多其餘各省協餉並經戶部奏催迅解著廣鳳等於此項餉銀到境妥爲迎護並著明誼麟興車林敦多布揀派兵弁沿途護解毋得稍有疏虞科屬人心驚惶經廣鳳等安撫稍定仍著會同各旗王公安爲鎮撫毋令浮言得以動搖新疆軍事孔棘前經諭令聯捷俟黑龍江所派官兵到張家口時卽行統帶進剿著聯捷於該官兵到口時卽遵前旨迅帶起程由科布多進剿逆匪毋稍稽延將此由六百里各諭令知之○實授蘇廷魁河南布政使王正誼按察使○吳棠奏籌辦河運漕米章程從之○予甘肅平涼殉難知縣郭襄教諭趙青藜祭葬世職○戊戌貸盛京鳳凰城被水旗民籽種口糧○庚子諭議政王軍機大

臣等常清明緒奏救援巴燕岱官兵中途失利一摺巴燕岱城圍緊急伊犁所派赴援官兵於距城三十里之底窩鋪地方接仗潰退死傷無數皆由錫伯馬隊內向奔踴總管德克都又未督隊以致眾兵潰散殊可痛恨當此軍事喫緊之際若督隊各員均如此未敗先逃何怪匪勢猖獗至於此極著明緒嚴切查明該總管失事情形卽行按照軍法從事毋稍寬貸見在巴燕岱城圍未解金頂寺回氛尙熾伊犁官兵僅二千餘名民遣各勇均不足恃賊眾數十倍於官兵儼令扼我咽喉薪米皆無來路伊犁勢將坐困回疆軍事敗壞至此何堪設想關內之兵如楊岳斌鮑超等雖經疊次催調本日復經寄諭嚴催仍恐緩不濟急穆圖善一軍本令其出關剿賊見在甯夏軍情已形得手都興阿慶昫內守外攻不難蒞事穆圖善自當懷遵前旨迅速出關已拯伊犁之危著該將軍

卽行統帶所部取道嘉峪關先抵哈密會同文祺布置一切卽行取道前進縱不能直趨伊犁亦可先將古城烏魯木齊等處之賊痛加掃蕩節節進剿但能收復烏垣亦可以張吾軍而褫賊魄回疆軍務或有轉機該將軍惟當迅速啟行以副委任毋稍宕延鶴齡所帶兵一千五百名本日已諭令駱秉章催令迅赴都興阿軍營如穆圖善出關兵尙不敷著都興阿卽將此軍撥歸統帶以厚兵力穆圖善出關後軍行糧隨餉需軍火一切至爲緊要卽著責成恩麟張集馨設法源源接濟以期士飽馬騰該護督等務當力爲其難顧全大局毋得稍分畛域致誤戎機常清前因武隆額奏參已有旨革職查辦投明緒爲伊犁將軍係屬十月間事何以明緒此時尙未接奉此旨該將軍領袖各城責無旁貸惟當就見有兵力妥爲撫馭嚴備不虞但能堅守數月則關內援兵陸續進發

必可大殄逆氛所陳兵疲餉絀逆勢猖獗情形朝廷早經洞鑒勦撫機宜惟在該將軍妥爲辦理原不豫爲遙制惟回逆狡詐多端虺蛇成性該將軍擬派員前往回營設法招安以爲緩兵之計自係出於無可如何但當穩慎以圖萬不可爲回所給墮其奸計致蹈滇隴覆轍另片奏革員陳孚恩樂斌此次伊犁被圍該革員籌餉籌兵不遺餘力懇請釋回等語該革員等既在伊犁尙能出力著加恩准其釋回仍著畱於伊犁幫同辦理一切兵餉事宜但能始終出力並准明緒酌量保奏候旨施恩明緒卽行飭知該二員令其仰體朝廷寬大之恩力圖自新以期晚益伊犁領隊大臣布爾和德等聯銜奏參常清自到任以來軍民共怨上下離心並坐視庫車烏垣疊陷漠不關心等語常清前次被參各款業已交明緒查辦此次布爾和德等所陳各情並著明緒彙入前案一併嚴

切查明具奏毋稍回護布爾和德等摺一件著鈔給明緒閱看將此由六百里加緊諭知都興阿穆圖善明緒並傳諭恩麟張集馨知之○論據明緒等奏伊犁救援巴燕岱之兵中途失利見在賊眾兵單恐扼該城咽喉情形萬分喫緊各等語前經諭令鮑超於假期一滿卽日率領所部各軍起程出關進剿該提督請撥川省制兵四千名並由川招勇數千名諒駱秉章已妥爲籌辦見在伊犁軍情萬分危急著駱秉章傳知鮑超無論假期已滿未滿卽日整頓隊伍率同宋國永等分起取道出關節節進剿以救倒懸之危其雲慶一軍俟閩省軍務稍平仍准鮑超調回以厚兵力該督等仍遵照上年十二月十五日寄諭妥速籌辦不得稍涉遲延以副委任鶴齡由階州統帶赴甘之官兵一千五百名已到何處著駱秉章飛催赴都興阿軍營聽候調遣毋任觀望將此由六百

里加緊諭知駱秉章並傳諭鮑超知之○諭楊岳斌自補授陝甘總督回楚募勇業經半載有餘疊經諭令該督速募成軍統帶赴甘以維大局茲據明緒等奏伊犁救援巴燕岱之兵中途失利見在賊眾兵單情形萬分喫緊等語伊犁爲統領各城重地設有疏虞情形更難設想該處盼望援兵誠屬刻不可緩該督募勇一事如已辦有頭緒卽應整隊赴甘以便都興阿穆圖善之兵早日騰出鼓行而西以收底定西陲之效儻該督仍以勇未招齊赴甘稍遲一日則援剿新疆亦遲一日關繫誠爲不淺著楊岳斌懷遵疊次諭旨迅卽料理起程不得再事稽延以副委任將此由六百里加緊諭令知之○以協守伊犁出力免革員樂斌陳孚恩罪仍畱辦兵餉事宜○予伊犁被戕協領烏勒喜春等祭葬世職○辛丑僧格林沁奏上年十二月十九日臣令翼長恆齡常星阿等帶領

馬隊暨總兵郭寶昌等步隊由北面進攻甘露臺踞賊翼長成保等各帶馬步由南面進攻張八橋賊寨我軍行至塔兒灣地方探得該處有小股潛匿營總何建鼇卽令參將施紹恆率兵兜圍斃賊數十名生擒四十餘名恆齡等擒獲巡哨賊匪二十餘名該逆知我軍兩路進取未敢出敵二十一日飭郭寶昌何建鼇等分南北兩路偪賊安營並派恆齡成保等馬隊列陣於何建鼇郭寶昌營盤左右以防撲犯郭寶昌等先在北路紮營甫成四壘馬賊遽擁來撲郭寶昌督率所部出營扼擊槍礮齊施斃賊無數成保復帶馬隊橫出鈔襲賊勢大亂我軍乘勝追擊壓過山岡其何建鼇等帶領步隊至南路塔兒灣安營尙未紮定大股馬步賊匪遽擁而來恆齡等令我軍馬步隊佯退誘賊深入恆齡等率領馬隊從旁突出更番進擊賊勢披靡常星阿何建鼇復率本隊鼓勇轉戰

併力追剿殺賊無數敗賊向梁窪一帶逃遁恆齡等合軍追擊踏
毀沿路逆壘數處直抵張八橋老巢收隊是日共計殲悍賊二千
餘名生擒七百餘名何建鰲卽乘勢立營與郭寶昌營互相聯絡
該逆經我軍痛剿遂於二十一日乘夜西竄臣於二十二日親督
馬隊並郭寶昌步隊探迹追擊該逆業已遁入山險賊情詭詐難
保不乘虛折向東北圖擾河洛臣飭常星阿郭寶昌等跟蹤追剿
並飭總兵張曜宋慶等作速由魯山拔營前進會同常星阿等實
力緊追無使該逆喘息臣卽於二十三日督帶恆齡等馬步各隊
取道汝州向洛陽一路進發以期繞前堵截正拔隊間據郭寶昌
等稟報二十二日督軍追至清涼寺地方殺賊千餘名該逆已向
汝州正西白楊樹一帶竄去遂飭常星阿等緊躡賊後旋探得該
逆有圖奔洛陽之說臣卽於二十四日督軍馳至興隆鎮地方擒

獲賊探十餘名供稱該逆等知馬隊官兵追擊甚緊仍欲向西路
山內遁竄等語且探賊蹤見在嵩縣西北一帶盤旋該處俱係山
徑馬隊難以展布儻該逆一經北竄則宜陽永甯一路正當其衝
臣遂於二十六日督軍由洛陽取道宜陽至永甯正東韓城鎮駐
紮覘賊所向相機堵剿與常星阿郭寶昌等軍前截後追期將此
股殘寇就地殄滅見已函會將軍國瑞督兵進紮河南府聯絡聲
勢並飛飭河陝汝道督帶兵勇駐防朱陽關以遏賊匪西竄之路
查此股髮捻各匪竄入豫境爲數不過萬餘近經官軍疊次痛剿
僅賸五六千名就賊勢而論以臣見有兵力已敷調遣見復催提
督姜玉順督隊進紮荆子關以重西路之防若川陝兩省有兵扼
防剿辦庶易得手所有前調總兵詹啟綸及抽調副將黃秉忠同
知史念祖等軍此時賊蹤漸向西趨距江皖等省千有餘里似未

便徒勞師旅擬暫緩徵調以節經費至二十一日之仗常星阿與
恆齡何建鰲等臨陣決策悉合機宜大獲全勝相應請旨將常星
阿舒倫保溫德勒克西等開復原參處分並賞還勇號以爲奮勉
圖功者勸 上諭議政王軍機大臣等賊踞張八橋等處經僧格
林沁督飭恆齡郭寶昌等馬步各隊兩路進取賊眾奔潰斬獲不
少逆眾向汝州白楊樹一帶竄去該親王飭常星阿郭寶昌緊蹙
賊後並親督馬步由洛陽取道宜陽至永甯正東韓城鎮駐紮覘
賊所向相機堵剿著卽督飭常星阿等前截後追務將此股逆眾
就地殲除並隨時嚴密偵探毋使遁入山險負隅爲患張之萬卽
催令張曜等會師合擊並嚴飭河陝汝道督帶兵勇駐防朱陽關
以遏逆匪西竄之路此股逆匪雖止贖數千名而漏刃餘生困獸
猶關以刻下情形而論若遁入深山馬隊無從施展必須多用步

隊方能得力前調之詹啟綸黃秉忠等軍已屢次催令赴豫仍著
僧格林沁嚴檄到營酌量調遣山徑崎嶇該親王督軍深入未可
輕進必須格外慎重以奏全功設使該逆徑趨西北恐秦晉邊界
守禦不嚴仍當早爲飛檄知照一面派兵繞前遏截以期有備無
患先發制人姜玉順一軍著官文迅飭駐紮荊子關嚴扼西路要
隘毋令闖入完善地方將此由六百里各諭令知之○塔爾巴哈
台參贊大臣錫霖等奏酌撥蒙古官兵赴援伊犁得旨著卽迅催
博勒果素統帶土爾扈特官兵馳往應援烏魯木齊都統早經降
旨派保恆署理錫霖著毋庸前往惟當於塔城各要隘督飭蒙兵
嚴密防守並隨時撫輯彈壓毋稍疏虞○壬寅諭內閣國家綏懷
遠服闔澤覃敷於外藩各國朝貢進京無不體恤備至恩禮有加
凡賞賚筵宴及一切典禮定例本極周詳第恐日久相沿各該承

辦衙門或致視爲具文供應草率殊非朝廷厚待遠人之意見值朝鮮琉球使臣來京朝貢著各該衙門於一切應行事宜務須恪遵定例揀派委員詳慎辦理毋得任聽吏胥苟簡從事該堂官等仍應逐一稽察如查有辦理不能妥協之處卽將承辦之員據實參處以昭慎重而示懷柔○諭議政王軍機大臣等曾國藩奏疊奉諭旨恭摺覆陳一摺所陳剿辦捻匪宜用淮勇西路軍務宜併力先清甘肅再及關外並餉源日匱必須多撤楚勇各條均於時勢軍情確有見地劉銘傳等軍前據李鴻章奏所用洋礮軍火最爲笨重運送頗難當經諭令毋庸檄調赴豫並令李鴻章與左宗棠籌商如閩省應需該營前往協剿卽檄調劉銘傳統軍赴閩聽候左宗棠調遣此次曾國藩所奏各情均與前旨脗合見在僧格林沁督兵偪賊立營大獲勝仗軍威已振毋須再俟淮勇助剿所

有劉銘傳所部卽著咨商李鴻章恪遵前旨酌量調赴閩省以資厚集甘肅軍務未清原不能揚威塞外第新疆南路各城大半淪陷烏魯木齊及古城之漢城先後爲賊占踞北路亦形岌岌若不迅圖埽蕩恐全局淪胥必致不可收拾昨因伊犁危急諭令穆圖善迅速帶兵出關並令鮑超卽日整隊西行著懍遵前旨趕緊辦理至鮑超赴甘前因沈葆楨奏到已有旨准其將所部八千人統帶前往曾國藩所稱鮑超回蜀募勇宜用川北保甯龍安兩府之人一節保龍二府兵勇與甘肅風氣不甚相遠且皆可徑達階州自較川東之勇尤爲得力著駱秉章傳知鮑超迅速馳赴川北募勇成軍剋期赴甘一面檄調宋國永等軍由江西馳赴川東督帶舊部續行入甘毋稍遲誤其所需軍餉一切仍著駱秉章源源籌解以利師行曾國藩以餉源日匱擬請多撤楚勇自係目前第一

急務卽著將劉連捷朱南桂朱洪章三軍次第裁撤以節糜費至
車志俊等諸降眾尤應妥籌安插善爲遣散庶騰出有用之餉以
供畱防之勇濟西征之軍於大局實有裨益將此由六百里諭知
留國藩駱秉章並傳諭鮑超知之○諭喬松年奏皖省兵力未厚
請畱英翰防守潁州一摺昨因僧格林沁奏張八橋剿賊獲勝若
遁入深山必須多用步隊方能得力前調之黃秉忠等軍當經諭
令該親王嚴飭到營酌量調遣茲據喬松年奏稱賊蹤竄無定向
儻英翰遠出赴豫恐賊乘虛竄入皖境自係實在情形英翰著仍
畱潁州布置防守黃秉忠史念祖兩營均著無庸赴豫喬松年務
當督飭該臬司統帶所部實力籌防如豫賊東竄卽行迎頭截擊
毋任闌入僧格林沁在豫剿賊漸次得手儻賊蹤紛竄必須皖兵
截擊仍著喬松年酌撥兵勇前往助剿以期厚集以上各情均著

該撫咨明僧格林沁遵照辦理前因王拯奏參喬松年近於巧宦當經諭令曾國藩隨時察看據實具奏茲據曾國藩奏稱喬松年門丁常杏洲捐納官階迹涉招搖後令還歸本姓名曰楊澍改充委員各官羞與之齒等語喬松年由道府擢任封圻宜如何潔已奉公正色率屬以副委任乃縱令家丁蒙混報捐以致人言嘖嘖輿論沸騰本應治該撫以應得之咎惟念喬松年自升任皖撫以來辦公尙屬認真此次姑免深究楊澍卽常杏洲著該部查明無論報捐何項官職卽行斥革並著喬松年卽行驅逐出境不准在署逗留嗣後喬松年務當精白乃心整躬馭下禁苞苴遠僉王將皖省善後各事宜實力經畫庶可保全聲名長承恩眷儻再稍不謹飭被人指摘必不能復邀寬宥也懷之慎之將此諭令知之○諭都興阿穆圖善奏攻剿甯夏附城賊圩大勝派員赴楚募勇各

招片甯夏附城賊圩經都興阿等分路進攻殺傷逆匪將以千計
大挫兇鋒勦辦甚爲得手該逆經此次痛勦其膽已寒著都興阿
乘此聲威督率各軍將城外各圩迅速掃蕩進拔堅城肅清邊圉
前據張集馨奏曹克忠一軍攻破高家堡逆巢擬進攻蕭河城是
靜甯一帶驛路漸可疏通惟固原踞逆尙在相持雷正綰近日勦
辦情形若何著卽妥籌攻取將首逆孫義寶等設法擒斬毋令免
脫其曹克忠一軍應如何進勦之處仍著都興阿雷正綰妥爲籌
度甘省兵力尙單都興阿等擬派副將陳東霖等赴湖北募勇八
營以資攻勦著照所議辦理所需槍礮等項卽著咨照官文按照
營制給發前經寄諭富明阿飭令詹啟綸選勇三千名赴僧格林
沁軍營調遣昨據僧格林沁奏豫省各軍已敷調撥請將詹啟綸
一軍暫緩徵調見在甘省旣嫌兵單如須詹啟綸之兵赴甘助勦

卽著都興阿咨商僧格林沁妥籌調撥杜嘎爾見在隨營攻剿未能兼顧甯夏副都統任內之事卽照都興阿所請仍令常陞戴罪暫行署理責令整頓操防幫同慶昀將城守事宜認真籌辦儻再不知奮勉卽行從嚴參辦將此由六百里各諭令知之○命劉蓉查陝西被擾州縣及歉收地方分別輕重妥籌接濟○裁山西甘餉捐局○追予安徽殉難道員何桂珍諡文貞知州劉騰鴻諡武烈遊擊畢金科諡剛毅○以籌濟甘肅軍餉予山西巡撫沈桂芬優敘○癸卯諭議政王軍機大臣等張凱嵩奏進剿思恩賊匪連破賊卡生擒首逆宋扶桿一招逆首業已就擒餘匪自不難剋期掃蕩卽著該撫督飭易元泰等迅將黎村踞匪悉數殲除並乘此聲威進剿武緣上林等處土匪以清餘孽另片奏孫仁廣股匪結黨抗拒官軍恃種峒爲巢穴經劉坤一等軍疊次進剿旬日之間

蕩平逆壘三十餘處南北兩岸賊勢漸衰剿辦尙爲得手並著該撫嚴飭劉坤一李能通李士恩等速克大廟江口進偏那壇賊巢並埽平格木踞匪進規永淳縣城毋稍鬆勁另摺奏廣西被擾年深諸形疲敝見擬經權互用及時整飭地方先將籌辦大略情形開單呈覽該省被擾日久諸務廢弛見在腹地漸形靜謐亟應設法整頓力挽頽風該撫所陳時務六條自係因時制宜之策卽著督率兩司等通籌利弊認真辦理隨時具奏以期綱舉目張俾政治日臻上理不得以與例未符意存牽就將此由五百里諭令知之○在籍太子少保尙書銜廖鴻荃卒予祭葬諡文恪○甲辰諭議政王軍機大臣等恩麟等奏近省賊蹤擇要防剿先顧省城並會勘階州獲勝派員督辦軍糧河州回族應撫各摺甘肅狄道河州渭源靖遠徧地狂氛無論進剿何路均應先顧省垣而省垣患

靖遠之匪較河狄爲尤甚靖遠被鹽固回匪圍攻日久陶茂林前
派高餘慶帶領五營前往援剿雖連次獲勝究未大挫兇鋒著卽
添調數營前往剿辦先解城圍再圖進取馬步回逆擾及平番之
武勝伏羌等堡肆意搶劫西大通之海石灣上礮堡亦有回匪勾
結恩麟已飛調莊浪滿綠營官兵剿辦著嚴飭該營弁等迅圖撲
滅如兵力不敷再於附近一帶酌量添調所請令穆圖善親督勁
旅或抽撥精兵由草地繞赴平番並分兵由涼州迎頭攔截之處
刻下情形斷難照辦穆圖善疊經有旨令其出嘉峪關前往哈密
見在文祺病故匪眾有窺哈密之意著該將軍仍遵前旨迅速整
兵出關前往哈密必須將哈密保守將來方有進兵道路肅州兵
不宜多調西路之防都興阿務當分兵兼顧保全甘涼肅郡縣未
可視爲緩圖曹克忠一軍前諭都興阿等妥爲調派應否駐紮會

靜適中之地扼制羣昌洮岷一帶著卽妥籌分布期與陶茂林聯絡聲勢會合夾擊雷正綰當力拔固原殄除孫逆近日勦辦情形著趕緊馳奏以聞階州髮匪已形窮蹙著恩麟飭令林之望督同張華會合川陝各軍實力進攻剋日殄除並令林之望專督辦運就近嚴催各屬採辦米糧協濟毋誤軍食河州回族眾多見既踴伏不動自可暫緩勦辦馬乚氏辦撫前已毫無成效該護督欲藉以羈縻俟兵力充足再行籌辦尙無不可此時就計招撫嚴定條約但恐該逆眾不能悉遵仍不免重煩兵力必須一面辦撫一面嚴防毋得稍涉大意方爲妥善將此由六百里諭知都興阿穆圖善雷正綰並傳諭陶茂林恩麟知之○諭恩麟奏烏魯木齊提督文祺自哈密起程赴烏沿途感冒風寒於十一月二十日在巴里坤病故見聞濟木薩木壘河三箇泉等處失陷古城雖駐有蒙兵

不知紀律吐魯番回匪句結該處纏頭回子業已占踞城垣有窺伺哈密之意等語前因新疆需兵甚急諭令穆圖善統帶所部取道嘉峪關先抵哈密會剿進取見在同匪窺伺該城防守喫緊穆圖善指日出關前赴哈密扎克當阿即可與該將軍會籌防剿迅殄逆氛穆圖善未出關以前扎克當阿仍當就見有兵力嚴密布置毋得稍有疏虞文祺因病出缺保恆見署烏魯木齊都統責無旁貸古城漢城失陷後吐魯番回匪復句結該處纏頭回子圖窺哈城著保恆嚴檄蒙古官兵實力剿辦一面規復古城一面繞前攔截嚴扼該匪東竄哈密之路古城滿城近日防守情形並著保恆隨時具奏將此由六百里各諭令知之○予故烏魯木齊提督文祺祭葬卹廕如軍營病故例○乙巳太白晝見○以孟春時享太廟 上前期親詣行禮○丙午頒賞朝鮮國王李熙琉球國

王尙泰扁額○廣江西蓮花廳靖安縣學額六名○丁未諭內閣
前因熙麟奏參前署陝西巡撫張集馨奸邪險詐諂媚卑污各款
當經諭令劉蓉查明具奏茲據奏稱張集馨於入陝後卽結納多
隆阿左右之人託以取寵嗣多隆阿帶兵抵省張集馨獨遠赴十
里鋪執手板迎謁道左屈膝請安其諂媚逢迎眾目共覩提督馬
德昭在省城捍禦回匪有功張集馨因其貽書曹克忠有張藩臺
有餉不給可惡之語以故懷恨列入彈章張集馨在署藩司任內
欲派私人署缺又授意回紳使主撫議署臬司鳳邠道劉鴻恩不
肯判行且於張集馨之痛詆馬德昭面訐其非張集馨因此觸怒
密具疏彙送多隆阿會銜具奏嗣多隆阿未經會銜張集馨愧赧
失措於大庭中向劉鴻恩屈膝請罪等語張集馨係疊次獲罪棄
瑕錄用之員宜如何激發天良力圖報稱乃如所奏各情巧於逢

迎居心險詐實屬大負委任陝西按察使張集馨著卽行革職永不敘用馬德昭旣據劉蓉奏稱二年六月間回匪壘撲省垣該員奮勇殺賊力保危城著有戰功著開復提督原官劉鴻恩原參之案旣係屈抑著開復道員原官仍畱陝西補用以示彰瘴無私至意張集馨任用之知縣李煒等著劉蓉隨時察看如有劣款卽行嚴參毋稍徇隱○諭議政王軍機大臣等劉蓉奏進剿階州逆匪獲勝並蔡逆被剿受傷請飭恩麟委員辦理階州糧運固原平涼各匪回竄靈臺等處各摺片階州踞匪經劉蓉督飭蕭慶高等痛加攻剿疊獲勝仗據投誠逆匪供稱蔡逆於官軍進攻兩水逆壘之役身受重傷設計圖竄該撫見飭各軍會合川隴各兵相機圍剿該逆憑城踞壘狡悍異常卽著劉蓉嚴飭蕭慶高等設法誘出大隊一鼓殲除儻恃險不出卽當悉力圖攻毋任紛竄並著駱秉

章飭令周達武等軍會合夾擊迅殲醜類據該撫奏稱蔡逆欲留
啟逆於階自出銀二萬兩誘買該處番民冀由南坪竄出番民赴
周達武軍營納款願誘該逆深入官兵伏路要截冀得分其輜重
等情番民素性嗜利未可深信著駱秉章劉蓉嚴飭在防各軍加
意防範並籠絡番民俾不至爲賊所用方爲善策前據恩麟奏已
派林之望前赴階州辦理糧運事宜自可源源接濟無誤要需該
撫所請飭令恩麟派員辦理糧運自係未接恩麟行知著毋庸議
平固逆回竄擾靈臺縣擾及獨店分股竄至隴州屬之銀湖汧陽
屬之上店鎮等處焚殺甚慘劉蓉請飭雷正綰曹克忠各抽所部
三營分紮邠長汧隴兩路力顧陝境自以邠隴爲甘省入陝咽喉
又爲後路糧運要道恐該逆乘虛回竄惟雷正綰見在攻勦固原
正在得手勢難分兵前往著都興阿雷正綰酌度情形如曹克忠

一軍尙可調撥卽著分撥數營馳赴邠隴等處以顧陝防將此由六百里各諭令知之○予甘肅陣亡總兵官蕭舉臣參將彭長林祭葬世職○戊申諭議政王軍機大臣等文祺奏南北兩路軍務情形請飭催大兵出口扎克當阿奏南路聲息不通北路軍務喫緊哈密危急並巴里坤哈密兵餉兩絀咨調各路援軍請將伯錫爾暫署幫辦大臣各摺片提督文祺病故奇台所屬三箇泉地方突有賊匪一二千人勾結吐魯番纏頭回子滋擾直撲木壘道路梗阻與前日恩麟所奏情形大略相同前因回疆逆燄鴟張疊經諭令穆圖善統帶所部取道嘉峪關先抵哈密會同該城官軍布置進取茲據扎克當阿等奏稱南北兩路賊勢愈熾人心驚惶無措等語是回疆近日軍情倍形岌岌著穆圖善懷遵疊次諭旨迅速出關前赴哈密會同扎克當阿妥籌進剿掃蕩逆氛甯夏官軍

已偏城根勦辦正在得手穆圖善起程後著都興阿將甯夏攻取
事宜嚴密布置迅拔堅城毋得稍涉鬆勁保恆扎克當阿當就見
有兵力堅守待援俟穆圖善大軍到後即可會籌規取節節進攻
以期大張撻伐該匪直撲木壘中途滋擾意在隔絕巴里坤古城
往來之路著保恆扎克當阿色普詩新調派官兵在各該城卡要
隘地方認真防堵俾聲息相通該逆不得阻我進兵之路方爲妥
善其道路梗阻各城保恆等仍當設法偵探隨時奏聞文祺奏從
前南路軍興口內征兵到哈裹帶口糧向由安肅道備辦輓運來
哈見在奇古一帶被賊蹂躪無從採買將來兩路軍糧需用浩繁
請飭先期豫備等語卽著恩麟責成安肅道將如何採辦之處豫
爲籌畫以免臨時周章哈密幫辦大臣卽照扎克當阿所請令扎
薩克郡王伯錫爾暫行署理將此由六百里諭知都興阿穆圖善

保恆扎克當阿色普詩新並傳諭恩麟知之○以陳湜爲陝西按

察使

記名按察使

○已酉諭議政王軍機大臣等阿克敦布等奏西剿

官兵取道蒙古臺站豫籌供應款項開單呈覽一摺黑龍江官兵
五百名前諭取道張家口交聯捷統帶進剿須經由察哈爾蒙古
臺站該處地處沙漠師行一切應用各臺站向來所無額設蒙古
包馱馬等項爲數無多亦難敷一軍之用阿克敦布等擬於馬馱
一項由商都達布遜諾爾太僕寺各牧羣先期撥往該臺以備乘
騎事畢歸羣並由向來幫臺之各扎薩克旗及察哈爾八旗另行
攤備馬馱分赴各臺以備更換所籌尙妥卽著照所請行惟此項
征兵每日需用帳房什物及廩羊米鹽等項據阿克敦布等估計
統應需銀一萬五千餘兩該都統擬於口內外各旗羣普勸捐輸
以資備辦自係爲節省帑金起見惟該蒙古等生計本屬艱難此

次師行幫貼已形困苦再令捐輸殊不足以示體恤且將來陸續徵調官兵經過該蒙古臺站者尙恐不止此起尤難爲繼所有單開應行製造購辦諸物需銀一萬五千四百兩卽著劉長佑由直隸藩庫如數撥解察哈爾交該都統備辦以應急需並須迅速派員解往俾資趕辦無誤師行阿克敦布等於此項銀兩未到之先並可於張家口稅局先行提用俟直隸銀兩解到再行歸款察哈爾所屬蒙古四十四臺站之外卽入烏里雅蘇台科布多塔爾巴哈台地界明誼車林敦多布麟興廣鳳奎昌錫霖圖庫爾亦當一體先期妥籌以便前項征兵到境無誤供支並著阿克敦布廉至卽將察哈爾各臺站供應此項官兵一切辦理章程飛速知照各該城將軍大臣等妥籌照辦務於官兵未到之先豫爲籌策毋致臨渴掘井有誤師期該三城所需此項供支經費著沈桂芬於山

西藩庫迅速撥銀一萬五千兩分解烏科及塔城各五千兩以資應付新疆軍事孔亟聯捷於黑龍江官兵馳抵張家口卽當統帶星速起程相機進剿毋得藉口各該城臺站未備任意逗畱穆圖善見在駐師甯夏前因伊犁匪熾諭令該將軍迅統所部出嘉峪關先抵哈密布置一切卽行進剿古城烏魯木齊等處之賊聯捷於馳抵科城後或由塔爾巴哈台直趨伊犁或探明道路與穆圖善聯絡聲勢會籌進取均著該大臣臨機應變妥籌辦理將此各諭令知之○辛亥諭議政王軍機大臣等曾元福奏巨逆洪橫被礮震斃全臺肅清一招洪橫稔惡倡亂厯有年所見旣被礮震斃則其餘漏網之徒不難殲滅淨盡著曾元福丁曰健督飭在事員弁實力按捕務絕根株毋畱餘孽臺灣地方雖經肅清而漳州一帶賊氛尙熾難保不勾結臺屬匪類乘機煽惑曾元福見已將搶

關各犯拏獲懲辦以定人心仍著會同丁口健實力巡查妥籌防範毋令漳郡逆匪偷渡勾結左宗棠徐宗幹務當督飭將弁兵勇將漳龍等處踞逆迅速掃蕩俾免日久蔓延臺灣善後事宜並督率曾元福丁日健次第籌辦務令事事悉合機宜以期一勞永逸將此由五百里諭知左宗棠徐宗幹並傳諭曾元福丁日健知之○王子諭議政王軍機大臣等雷正綰奏攻剿固原追捕竄賊會商進兵道路籌辦軍食曹克忠派弁赴楚募勇請調土司帶隊助剿並曹克忠一軍不克回顧潼關各摺片固原城東逆匪分股東竄雷正綰率親兵圍隊窮追盡一晝夜之力奔馳三百餘里曹克忠亦派馬隊趕至逆眾竄陷靈臺旋經官軍克復餘匪奔涇州南關亦經該提督派兵剿除淨盡見會商曹克忠急攻蕭河城該提督攻打彰義堡此二巢係逆匪家屬聚處所如固城逆回

出救老巢環市各營即可乘便襲城所辦甚妥著卽督飭諸將併力進攻使該逆首尾無從相顧自可處處得手軍糧艱窘士卒豈能枵腹從事雷正綰前飭隆德縣知縣李超羣豫備白麪三十萬斤乃該縣所備不足三萬斤據該提督奏稱其人言語狂詐不治輿情前委赴莊浪催糧卽有紳士控告等語著恩麟與前次論查之靜甯牧黃松年一併確切查參不准稍有瞻徇雷正綰等營口糧並著恩麟嚴飭所屬設法採買運解以收飽騰之效如再匱乏惟該護督是問洮州土司楊元旣據曹克忠咨稱該土司稟求願帶馬隊助剿著准其札調蠻兵馬隊一千名令楊元親自統帶如不得力卽行撤回如果著有勞績准其酌量保奏恩麟卽飭該土司迅赴曹克忠軍營毋稍遲延曹克忠派參將傅先宗前往湖北招募勇丁四千名助剿經過湖北河南陝西等省著官文吳昌壽

張之萬劉蓉於此項勇丁到境時飭屬照例供支口糧以利進行
官文並酌量撥給每營擡槍小槍帳房若干俾資應用如招募之
員敢於沿途滋擾卽由該督撫等查明遵照前奉諭旨奏參懲辦
劉蓉以髮捻各逆已近潼關咨調曹克忠十六營回陝並分防邠
長汧隴等處茲據雷正綰奏曹克忠除畱防秦州隆德等處外見
在僅存八營軍情甚屬喫緊萬難回陝等語雷正綰所募勇丁已
有由楚入陝者如潼關需兵防剿著該撫酌量截畱如其無警仍
飭令陸續赴甘汧隴一股係會甯郭城驛竄逆有總兵胡大貴等
追剿劉蓉又已派數營屯紮足敷剿辦著該撫卽飭派出各營會
同胡大貴等實力兜剿毋稍鬆懈雷正綰另片奏靈臺縣城失守
署令祝賓揚全家殉難外委李培滋縋城先遁情殊可惡著都興
阿恩麟查明按照軍法從事教諭史繼尹典史徐承澍是否出城

辦糧並著查明具奏已革知縣吳瑩令馬萬良等率領回民把守城門不許漢民出入吳瑩全家經回民送至城外禮拜寺及大兵到境逆回奔逃吳瑩率領本地回民接取官衙錢糧民間積聚與回均分據該縣士民公稟情形與通匪無異吳瑩侵冒兵糧前經有旨革拏著都興阿恩麟即將該革員拏問如通匪各情屬實卽行正法以昭炯戒雷正綰請調蘇倫保常星阿溫德勒克西富森保四起馬隊本日已諭令僧格林沁酌量調撥如此項馬隊尙有畱楚者卽著官文派令赴甘以厚兵力將此由六百里諭知官文都興阿雷正綰吳昌壽張之萬劉蓉並傳諭恩麟知之○諭雷正綰奏逆回馬隊兇悍官軍各營皆係步隊而攢集馬勇近來馬匹倒斃甚多每次逆回竄敗步隊追趕不及匪徒轉多漏網若非添立馬隊秦隴之祲尙未有艾見在鄂豫髮捻十餘萬眾均已投誠

甘肅逆氛正熾請飭蘇倫保常星阿溫德勒克西富森保四起馬
隊赴甘會剿等語軍營衝鋒陷陣及追剿竄賊均以馬隊爲先此
時由鄂竄豫之賊爲數不過數千剿除自易而甘肅逆回正形猖
獗非得力騎兵勢難蒞事蘇倫保等四起馬隊著僧格林沁斟酌
豫省賊勢軍情或全數飭令赴甘或分撥數起前往俾西陲軍務
早就蕩平均著該大臣妥籌調派迅卽奏聞將此由六百里諭令
知之○癸丑諭內閣散秩大臣和碩額駙德徽內廷趨公年方壯
盛不意患病遽突然溘逝悼惜殊深業經派令鍾郡王前往賜
奠賞給陀羅經被著派總管內務府大臣寶鋆前往照料其喪事
官爲經理任內一切處分悉予開復應得卹典該衙門察例具奏
因念壽莊和碩公主釐降甫十數月猝遭此厄情形尤爲悽愴著
再賞給廣儲司銀一千兩以示篤念親親有加無已至意○甲寅

諭議政王軍機大臣等從前道光年間辦理夷務咸豐年間向榮督師江南均曾檄調四川屯兵臨陣衝鋒向稱驍勇嗣以南方水土不服該屯兵等均多物故又上年石達開巨逆竄擾川省敗經紫打地等處爲各土司兵誘入絕地官軍卒獲殲擒此項土司兵是否卽係從前所調屯兵又有土練番兵名目是否卽係此種見在同疆軍事孔亟南北兩路警報頻聞甘肅回氛急切未能蒞事出關之兵穆圖善所部無多專恃鮑超舊部及調募川兵川勇爲大枝勁旅新疆賊勢蔓延兵力尤資厚集該屯兵等見在能否得力其徵發檄調自與內地官兵不同如調派千名出關剿賊一應軍裝器械需費若何其按月支放口糧較之內地兵勇贏絀奚似又此兵調赴他省是否同於雇募須先給身價銀兩每名若干均著崇實駱秉章查明從前檄調屯兵成案及見在應如何辦理情

形詳細具奏至該屯兵等均係步隊登山涉險乃其長技關外地
方遼闊平原廣漠利在用騎此兵出關於地利是否相宜當不至
用其所短並著崇實駱秉章體察情形奏明候旨辦理將此由五
百里各諭令知之○諭毛鴻賓等奏官軍越境剿賊獲勝並派兵
防剿岑溪等處股匪各摺片福建漳州踞逆李侍賢勢尙猖獗平
和永定雲霄各城均爲賊踞汀州所屬地方賊氛肆擾與潮嘉各
屬接壤自應節節掃蕩穩慎進取方免顧此失彼之處見在何雲
章進攻雲霄楊清臣等進攻平和方耀等軍進規永定均已疊次
獲勝而賊匪尙圖死踞若不迅卽攻拔勢必阻我進兵之路著毛
鴻賓等督飭李福泰方耀等嚴檄各路將士先除永定等城各踞
逆將潮嘉等處之防布置穩固卽行督兵入閩聽候左宗棠調遣
以圖迅克漳郡左宗棠所調各軍計已先後到齊著卽嚴飭各路

之軍會合粵師奮力勦擊徐宗幹亦當令閩省見在之兵與調集各援兵聯絡聲勢遇賊卽擊以期壁壘一新速殄醜類至廣西岑溪縣屬河洞地方有賊首陳日升混名兩頭口股匪二千人攻踞古眉又有羊額股匪千餘與河洞賊匪勾連攻踞會村又大埕匪首羅阿光藤縣賊首霍十八等攻陷岑溪之疊容等處結拜洪家會意圖分竄統計各股不下六七千人日聚日多紛紛釀亂前據張凱嵩奏梧屬賊匪次第戡定洪逆餘黨仍恐未清見在賊匪既有結拜洪家會情事是餘匪勢漸猖熾恐又成燎原之勢且岑溪與羅定西南信宜等處在在毗連山徑叢雜更易藏奸毛鴻賓等已飭曾敏行任星元等分路勦辦著卽檄飭該副將等乘賊匪初起之時銳意進攻將首要各匪悉數接捕務期掃除淨盡毋畱餘孽羅定等處各地方文武員弁務當整飭團練協同防勦毋令賊

匪闌入張凱嵩務卽分派軍士會同曾敏行等實力勦辦或卽將駐潯之軍就近調往較爲便捷所有起事詳細情形並著毛鴻賓郭嵩燾張凱嵩詳查具奏將此由五百里各諭令知之○乙卯諭議政王軍機大臣等常清明緒奏伊犁萬分窘迫請撥軍餉武隆額等帶兵退回借調俄兵助勦並常清奏請治罪明緒奏陳地方情形各摺片阿奇木伯克邁咱木雜特前據常清奏因攤湊回戶錢文役回種地以致眾伯克聯名呈控請先行革職審訊此次纏頭回子糾眾舉邁孜木雜特爲王是否卽係此人見據聲言因委曲逼迫所致並於旗幟書寫官徧民反字樣明緒已派員議撫著卽剴切曉諭如前案果有屈抑不妨爲之昭雪但恐該回子藉此爲詞以遂其緩兵之計明緒當加意防範毋爲所紿巴燕岱一帶賊勢甚重武隆額布爾和德所帶之兵退紮湖廣橋地方著卽飭

令嚴密防剿毋令賊縱竄近伊犁城兵單薄明緒惟當固結人心認真防守以期眾志成城保全大局穆圖善已屢諭統所部迅速出關先抵哈密相機進剿前諭聯捷管帶黑龍江官兵五百馳赴科布多或直趨伊犁或會同穆圖善進取見在計可出關著明緒飛咨該大臣斟酌情形或卽令徑達伊犁藉資防剿借助俄兵一節亦是出於萬不得已著遵照上年十二月十一日寄諭酌量妥辦昨據廣鳳等奏解往古城之餉銀八萬兩已折回科城暫存提用三萬兩補放蒙兵欠餉俟歸綏道衙門解到撥還見在伊犁需餉孔亟著廣鳳奎昌卽將見存之五萬兩先行改解伊犁明緒錫霖一體派員沿途迎護其續到烏里雅蘇臺之餉仍著明誼麟興車林敦多布隨時知照明緒酌量數目設法派員迎提應用經過之科布多塔爾巴哈台各城均須迅速護送赴伊不得稍有延誤

常清業於上年十月初四日降旨革職聽候查辦何以此旨尚未奉到仍著明緒將常清被參各款詳細查明據實具奏所請採買各項准照市價覈銷之處已諭知戶部照辦矣將此由六百里各諭令知之○諭傳諭護陝甘總督恩麟明緒奏請飭甘肅迅將副茶數十萬封趕緊派員解赴伊犁等語伊犁民食兵糧幾致告罄情形實爲危迫口外茶葉貿易尙爲流通如此項副茶早日運到伊犁則銀錢轉輸藉可採買兵食以拯然眉著恩麟懍遵前次諭旨卽將所存副茶迅速撥運數十萬封派員由北路草地解交伊犁不得稍有遲延致誤要需將此由六百里諭令知之○丙辰諭內閣前因曾國藩等奏准徐揚海道轄境遼闊請仍設淮揚道員缺以重地方而專責成諭令議政王軍機大臣會同該部議奏嗣據給事中福寬奏請將江蘇揚州府改歸常鎮通海道管轄毋庸

仍設淮揚道員缺復諭令議政王等彙入前摺一併會同議奏茲據議政王軍機大臣會同各該部悉心酌覈奏明請旨曾國藩等因淮徐揚海道轄境遼闊難以周顧請復設淮揚河務道員缺係爲因時制宜起見著照所請准其復設淮揚河務兵備道作爲由外題補之缺管理淮揚兩屬其海州一屬巡道應管事件仍歸徐道管轄作爲徐海河務兵備道所有前經奏明統歸淮徐揚海道管轄之淮安府同知徐州府同知淮安府督捕通判揚州府清軍總捕同知四屬內應將何屬撥歸淮揚道管轄何屬撥歸徐海道管轄暨應否於淮揚河務道轄境添設移撥武弁官兵之處並著曾國藩等體察各處地段情形分別奏明覈辦至給事中福寬所奏請將揚州府改歸常鎮通海道管轄毋庸仍設淮揚道意在藉免裁設紛更而淮揚兩屬應汎員弁仍屬無所稟承殊未盡善著

毋庸議尋曾國藩等奏淮安同知淮安通判揚州同知皆隸淮揚境內應歸淮揚道管轄徐州同知所屬河務汛地應歸徐海道管轄以專責成該淮安通判所管汛地移歸改設之淮安同知專管駐紮清江浦其同知所遺汛地多在山陽境內卽改歸淮安通判兼管此外向歸淮海道專管之葦蕩左右兩營以樵採蕩柴爲專責近年柴款變價催徵等事奏明專派大員經理今旣復設道缺應改歸淮揚道專管以符舊制而免紛更至淮揚道轄境操防各營各有舊制見又添設淮揚鎮標應毋庸另議移改其修防官弁俟河運復興再行體察覈議下部知之○諭前因丁憂詹事府右庶子袁保恆擅遞摺報條陳事宜並有躬詣京師與廷臣籌商定議之語不諳體制降旨將該員交部議處本日據吏部議奏請將袁保恆比照官員妄行條奏降一級調用公罪例議以降一級調

用又據御史張觀鈞奏稱吏部援引例文未能確切查定例無言責官員將公事妄行具奏者降二級調用公罪官員妄行條奏降一級調用公罪此案袁保恆罪在無言責而擅發驛遞應照無言責官員妄行具奏降二級本例議處該部僅援降一級調用之例定議舍重從輕且與定例議處案件有一事而兩罪名相因而致者從其重者議處之例不符各等語著吏部查照該御史所陳各條將此次所議袁保恆處分是否允協之處再行詳細查覈具奏嗣後該部於交議事件遇有例內兩條相似而處分輕重不同者應如何確切援引隨摺聲明以杜遺漏牽混之處並著酌定章程以昭詳慎○左宗棠徐宗幹奏署福建臬司王德榜抵汀州後聞劉典一軍新挫卽率所部疾趨連城時連城所轄朋口莒溪兩要隘已有賊蹤十一月二十八日王德榜會商劉典分路進剿王德

榜率總兵蕭得龍等進攻莒溪斃悍賊四五百名劉典飭參將劉大謨等進攻朋口亦殺賊百餘名餘賊均向新泉南陽遁去十二月初十日王德榜進駐莒溪劉典飭李耀南等進駐朋口互相犄角王德榜偵知新泉之賊又退至下車南嶺一帶十二夜密飭李運勝等各挑趲捷勇丁出賊不意分路掩擊立將兩路賊壘攻破共斃賊千餘名其黃少春一軍由同安馳抵江東橋進紮漳城東北十餘里之北溪與高連陞就近聯絡十二月初四日高連陞派各營列隊好景山一帶自率二十餘騎赴東關挑之甫回至響水橋城賊蠶擁而至官軍大呼回擊賊不能支紛紛過橋而遁十五夜城賊忽出大股撲黃少春營壘黃少春卽率副將周紹濂等各營齊出適高連陞由響水橋馳至縱橫夾擊賊眾敗走而降將劉得義邱萬順兩營忽將參將周雲達遊擊黃元吉砍傷自率降人

將爲內應黃少春當派劉昌選分隊以禦城賊自率各營馳回掩捕當獲通逆頭目劉澧漳等三名勇丁二十餘名斬之劉得義邱萬順竄併賊中其隨逆竄逸者約不滿四百人十七日城賊復傾巢出東北兩門一由響水橋向瑞香亭進以牽掣高連陞一由崎下橋一由北尾橋向北溪進一由北門糾合樓內寨踞逆沿河直下偏黃少春各營黃少春飭各營靜以待之俟賊氣稍衰開壁縱擊適高連陞派錢桂仁等帶兵馳至黃少春卽督各營奮力衝殺賊勢不支而高連陞東路之師亦已將賊擊敗躡蹤追至矣方城逆之由東門來犯也高連陞見北門之賊分兩路出犯意恃逆必因劉得義邱萬順叛逃入城知黃少春兵力未厚將乘虛撲營當派錢桂仁等三營往援而飭各營鎮靜以待待至未刻高連陞飭丁賢發等從響水橋以鈔賊後張志公從好景山橫出夾擊自率

所部分路直前賊卽潰竄紛紛奪橋而走官軍向前痛擊生擒二十餘名斃賊數百名落水淹斃者不計其數竊惟東南餘逆全數竄入閩疆約有四大股李侍賢汪海洋丁汰洋林怔洋也侍逆踞漳城其分踞龍巖永定南靖雲霄之賊皆其死黨約十餘萬汪踞汀連南靖上杭交界之南陽計黨亦九萬有餘丁逆林逆則出沒漳龍間人數各約數萬而粵之潮嘉閩之泉漳汀龍等處素稱盜藪從亂亦復不少臣等以賊雖殘敗之餘而實皆漏誅巨寇粵東江西邊防愈固則賊之竄閩愈深將欲聚而殲旃非閩省厚集兵力不可見在主客各軍之可恃者規漳州則高連陞一軍四千六百餘人黃少春馬步二千餘人規龍巖則康國器一軍三千人劉明珍所部一千五百人汀連一帶專剿汪逆者劉典一軍馬步八千餘人王德榜一軍四千人王開琳老湘一軍三千餘人及臣宗

棠親兵各營三千人而已且防且勦兵力實形不足欲再廣爲徵調則閩省餉源早竭卽浙餉每月十四萬兩如期如數而來每月已欠至萬餘兩勢難勻撥以濟新軍之餉計惟有就見在兵力多方激勵以收餉節兵精之效此次黃少春所部降目劉得義邱萬順忽萌異志黃少春自請嚴議固屬咎無可辭惟當逆謀甫露之先該署提督卽將城賊擊退並追斬從逆弁目多名尙與尋常失察者有閒可否仰懇 天恩免其置議 上諭議政王軍機大臣等連城各軍進勦獲勝漳州官軍擊退撲營巨股所辦均尙得手著左宗棠先就見有兵力激勵各營將士實力進取以期節節得手前諭李鴻章令劉銘傳等槍礮隊由水路赴閩並令左宗棠察度一面催調一面奏聞著仍遵前旨檄調到閩分路調派以厚兵力李鴻章卽籌畫軍裝口糧令劉銘傳等分隊入閩並催令趕緊

部署起程毋任觀望劉銘傳軍餉李鴻章仍照舊供支到閩後亦當源源接濟不得稍分畛域黃少春所部劉得義等忽萌異志幸該提督立即追勒並斬從逆弁目多名與尋常失察者有間據奏黃少春自請嚴議之處著加恩寬免該督卽飭令黃少春奮勉圖功務將已降復叛之員弁等悉數殄除毋畱餘孽所請調員赴閩差遣委用著馬新貽蔣益澧卽飭周開錫吳大廷胡光墉張樹蔭四員迅速赴閩聽候左宗棠差委該督疊次奏畱浙省文員中並准其隨時調閩差遣但求有益地方不須限以資格閩省官吏因循積習難挽該督撫不妨隨時甄別參劾以期日有起色另摺奏蔣益澧任滿請准來京陛見一摺閩省軍務方殷蔣益澧在浙省籌餉籌防在在皆關緊要著傳知該藩司認真辦公於閩餉閩軍隨時接應協濟俟閩省軍務完竣再行來京陛見另片奏廈門稅

務司休士等盤獲遞送送信句通洋人之陳金隴卽陳九里已將該犯訊明正法並請將休士等嘉獎等語已令總理各國事務衙門議奏將此由六百里諭知左宗棠李鴻章徐宗幹馬新貽並傳諭蔣益澧知之○左宗棠奏上年十二月十九日漳城踞逆突分巨股由浦南上數里躡淺過河竄陷長泰縣城高連陞當派知府魏光邴等黃少春派副將李良平等於是夜三更渡河截擊至附城地方見該逆麇聚一大村中官軍突起衝殺立斃悍賊二百餘名生擒數十名官軍追至河邊渡未及半賊眾蟻擁而至遊擊龍順友力戰死之黃少春親率各營渡河接戰與魏光邴等兩路夾擊賊乃敗走共斃悍賊四五百名生擒八十餘名二十一日高連陞黃少春復督隊過河進剿當將長泰縣城收復其尙無下落之署長泰縣知縣陳疇及此次陣亡人員容俟查明另行具奏報聞

○命浙江月解銀十四萬兩濟左宗棠軍糈○予福建陣亡遊擊龍順友祭葬世職○丁巳僧格林沁奏髮逆賴汶沈捻逆張總愚陳大喜歐老紅任柱等股匪均因河洛一路有兵堵截復折而南竄至背子街一帶有圖奔魯山之勢臣於十二月二十八日督帶翼長恆齡成保等馬隊翻山追截查背子街一帶疊嶂層山崎嶇狹窄馬隊難以馳騁當飭參將蔣希夷等分紮要道杜其分竄惟東南一路直達魯山地勢稍平馬隊難以施展臣於初二日取道大營鎮向魯山前進先是翼長常星阿等帶隊進紮魯山據探該匪竄距魯山十數里圖犯城池臣卽督帶恆齡成保陳國瑞等馬步各隊馳抵魯山城下該逆馬步大股潮湧來撲臣卽揮令恆齡帶領馬隊在左成保在右常新阿居中一齊奮力衝壓逆勢不支紛紛敗竄我軍渡河追殺殲賊多名該逆窮極回鬪拚力死拒復

有另股馬賊欲鈔我軍之後營總富克精阿精色布庫等並不及時援應首先撤退以致恆齡等軍被賊所鈔翼長恆齡與營總保青副管旗章京那木薩賴等力竭陣亡幸副都統舒倫保營總常順等各帶馬隊從旁接應將賊截斷總兵陳國瑞亦帶小隊橫出阨住橋口使賊不能來鈔我軍得以殺出重圍約計傷亡官兵百餘名舒倫保常順督軍援應身受多傷同時陣亡因思翼長恆齡等俱係從征多年轉戰數省每遇勁敵無不身先士卒所向有功此次魯邑得以轉危爲安悉賴該員等力戰之績相應請旨將護軍統領恆齡等交部從優議卹以慰忠魂其餘陣亡官兵容俟查明請卹查此次接仗恆齡等率左翼馬隊竭力抵敵乃右翼營總富克精阿精色布庫等首先撤退致有挫卹實屬貽誤事機若不從嚴懲辦不足以肅軍令而飭戎行臣於收隊後將富克精阿精

色布庫卽在軍前正法以爲臨陣退縮者戒其恆齡所帶馬隊卽令協理台吉諾林丕勒接管並委充行營翼長以專責成初四日探得該逆南竄葉縣臣卽督隊緊追該逆復折竄東北圖犯襄城初六日我軍馳至襄城探得該逆在城北十餘里方莊羅塘一帶是晚大雪臣出其不意飭陳國瑞等乘夜往攻並令常星阿等馬隊隨後策應丑刻我軍到彼陳國瑞揮令步隊分攻方莊羅塘兩處賊壘縱火延燒焚斃無數其出竄者又經我軍截殺殆盡該逆遁踞石固驛十一日復向東北竄逸我軍跟蹤尾追至新鄭南路是晚臣令郭寶昌選帶部勇襲殺多名該匪向東北一帶奔竄我軍追至郭店驛呂莊十六日馳抵尉氏縣探得該逆向東南遁竄擬卽督飭官軍設法進剿不使該逆喘息以期就地殲除上諭議政王軍機大臣等逆匪回竄魯山僧格林沁揮令恆齡等奮力

衝壓而另股馬賊鈔我軍後路營總富克精阿等並不及時援應以致恆齡蘇倫保等被困陣亡覽奏實堪痛恨該大臣見已將富克精阿等軍前正法著卽將失利各營重加整頓以圖再振此次官軍失利經陳國瑞帶領小隊橫出扼住橋口使賊不能包鈔官軍得以殺出重圍實屬異常出力著僧格林沁傳旨嘉獎見在該逆由葉縣折而東北圖犯襄城陳國瑞等乘夜攻襲賊壘冒雪斬敵多名復由石固驛尾追至新鄭縣南郭店等處疊獲小勝官軍馳抵尉氏該逆復由縣西向東南竄走賊蹤飄忽靡常尉氏距開封省城較近四通八達尤防旁竄該處地方平行馬隊可以施展著僧格林沁卽飭陳國瑞常星阿等馬步各隊設法進剿前截後追毋使該逆得以喘息以期就地殄除詹啟綸一軍前據富明阿奏已於正月初十等日起程本日復經寄諭嚴催著該大臣飛檄

迎提飭令繞前截擊賊蹤向東奔竄去楚北邊防愈遠官文所部
成大吉等軍著檄令星夜赴豫合力進剿其防剿荆子關之姜玉
順一軍並著官文酌量移緩就急調赴河南以上各軍到豫後統
歸僧格林沁調遣並著該親王嚴檄飛催飭令由何路進剿豫爲
部勒至窮寇反噬僧格林沁尤宜豫防務須隨時穩慎進取庶不
至爲賊所乘該大臣兵力如不甚厚卽應及時添調不可稍有惜
費之心行軍罰旣宜重而賞亦不可過薄退縮失機者固當按律
嚴辦其奮勇出力者卽可隨時保獎以鼓舞之庶幾所向有功開
封之防至關緊要著張之萬卽行帶兵回顧省城將省防一切妥
籌布置務臻嚴密賊蹤由尉氏縣西竄向東南恐其覬覦潁毫一
帶喬松年前奏業已起程回省著仍將潁毫一帶邊防迅速派兵
妥籌堵禦英翰一軍見紮何處並著妥爲調遣直隸山東兩省與

豫邊在在毗連該逆鋌走靡常一經官軍追急必致拌命狂竄太
廣曹單一帶更恐有宋憬詩餘匪賊蹤入境儻被勾結必致燎原
著劉長佑閻敬銘卽酌派得力之員帶兵駐紮嚴密防堵毋令渡
河而北山東藩司丁寶楨前有旨令來京陛見此時無論已未起
程及行抵何處均著劉長佑閻敬銘飭令迅速回東帶兵嚴防本
境要隘毋令賊蹤擾及完善各該督撫等均當先事豫防防兵之
外均須派有後路策應之兵無論賊蹤竄近何省均可與僧格林
沁追兵互相夾擊以殄寇氛而固邊圉儻漫無準備致令賊氛入
境又肆蔓延將來竄擾何省卽惟該督撫是問將此由六百里各
諭令知之○諭前據富明阿奏遵飭赴豫助剿之詹啟綸一軍於
正月初十十一兩日分起啟行馳赴僧格林沁軍營聽候調遣茲
據僧格林沁奏稱髮捻回竄魯山援軍未及接應以致蘇倫保恆

齡等戰歿見在逆勢猖獗由尉氏縣西向東南奔竄各等語是詹啟綸一軍一入豫境正可探賊所向迎頭截剿必須迅速抵豫以壯聲威而資得力著富明阿查明該營已起程者派員沿途趲催前進如有後隊尙未起程者嚴催剋日啟行毋稍延緩將此由六百里諭令知之○予河南陣亡護軍統領恆齡副都統蘇倫保等祭葬世職○已未諭議政王軍機大臣等劉蓉奏逆回分股回竄陝疆派兵截剿並擱襲獲勝逆蹤往西折竄及潰勇沿途滋事暨階州逆匪暗襲營壘追剿獲勝各摺片回匪句通逃勇自甘省華亭一帶從後山間道竄至汧陽地方旋向東南竄去經駐防之彭基品等軍由岐山追抵武功節節躡剿屢有斬獲並於新店子等處斬賊多名該逆西竄醴泉境內惟賊多馬隊飄忽異常而該處地勢平衍無可控扼非各軍會集不能聚殲雷正綰見派雷恆等

管帶馬步三營追剿入陝並著傳知曹克忠恪遵前旨酌撥數營
馳赴汧隴一帶會合堵截毋令逆氛踵竄陝疆劉蓉督飭彭基品
等實力跟剿以收夾擊之效其雷正綰曹克忠所派各營卽著劉
蓉妥籌調遣聯絡聲勢毋得稍分畛域致令賊勢蔓延王守基所
帶馬隊見經陶茂林催調赴甘第陝省兵力太單馬隊尤缺仍著
劉蓉酌量情形如須此項騎兵協助卽行飛咨陶茂林趕緊調回
以資得力參將王泰來經前任陝甘總督熙麟檄令招募楚勇赴
甘助剿乃添收捻匪六七百名濫招備數又剋扣口糧領餉不發
以致各勇心懷怨望中途潰散該參將竟自帶隊前行並不設法
安撫任聽沿途搶掠貽害地方實屬不成事體著都興阿文煜楊
能格查明王泰來招捻扣餉情形據實參奏從嚴懲辦其所募勇
丁或歸慶陽糧臺或調赴甯夏軍營並著趕籌安置毋令無營可

歸致生後患已潰各勇卽著劉蓉分飭地方員弁團練妥爲彈壓
儻敢恃眾擾害卽行截捕正法至王泰來添收捻匪係行至河南
所募並著知照張之萬飭屬一體嚴拏階州逆匪由兩水繞襲三
哨營壘經官軍嚴密扼剿斃賊四五百名見在階州各隘業經川
兵堵截可無竄越之虞惟西北兩隅路徑紛歧而兩水尤爲必爭
之地著恩麟督飭林之望張華等軍務於兩水各路擇要扼紮與
湘果等軍協力同心斷其旁竄以期節節進逼悉數殲除儻防範
不力致令蔡逆由西北竄逃必惟恩麟是問駱秉章仍飭周達武
等軍會合陝甘將士迅將蔡逆一股殄滅毋稍鬆勁階州三路官
兵必須擇人統率方免互相推諉之虞著劉蓉咨商駱秉章於得
力武職大員內斟酌一人奏聞請旨辦理回逆回竄陝疆已至醴
泉境內若折向東北奔竄越過涇河難保不窺伺晉省完善之區

著沈桂芬豫籌防範不可稍涉大意本日復據都興阿等奏官軍連獲四捷籌畫進攻情形及西甯軍事緊要請飭鶴齡前往鎮撫各等語都興阿等督帶馬步各軍進剿甯夏賊匪熱破城南逆壘移營進偪卽著乘此聲威穩慎進取攻拔堅城盡殲醜類西甯回目馬尅三等恣縱肆虐阿家呼圖克圖等所稟各節自係實在情形亟應揀派妥員前往鎮撫著駱秉章催令鶴齡迅速前進都興阿飭令該總兵統帶所部前往西甯妥籌辦理以資鎮攝不准稍涉遲延致滋貽誤將此由六百里諭知都興阿雷正綰駱秉章劉蓉沈桂芬文煜並傳諭陶茂林恩麟楊能格知之○辛酉張之萬奏上年十二月十九日總兵張曜會同宋慶等各率所部於魯山城北山坡斃賊多名二十日夜張曜等帶兵銜枚潛進繞赴魯境之蘆山西北設伏以待一面由蘆山廟開道直達賊巢該匪猝不

及防立即奔潰其應援賊眾亦被我軍擊敗時營總何建鼐在南
路紮營該匪率眾來犯何建鼐等佯敗誘賊深入翼長恆齡率馬
隊更番衝擊何建鼐等帶隊轉戰殲賊殆盡我軍田張八橋甘露
臺一帶尾追十餘里沿途踏毀賊壘無數統計陣殲悍賊數千生
擒六七百名二十二日張曜等督兵進剿至魯山屬之廊店該匪
正向西北奔竄追至瓦屋池東殲戮無算敗匪悉向汝州西北奔
竄二十四日僧格林沁督軍追至汝州之白沙一帶斬馘甚夥餘
匪奪路逸出適張曜等各軍踵至迎頭截擊斬斃尤眾該匪竄近
龍門因河洛有兵扼紮又因二十六七等日僧格林沁由洛陽宜
陽進紮韓城鎮官軍繞出其前不敢西向遂由伊陽之南翻山奔
竄張曜等軍分路追剿均有擒斬二十六日郭寶昌猝然遇賊爲
其所乘賊遂於二十九日回竄魯山正月初三日僧格林沁大軍

追及派隊出擊未能得手兵將多有傷損時總兵陳國瑞已到見前敵失利卽親率小隊馳往接應賊不敢偏而退初四日馬賊偏近葉城經臣派隊雕剿擒斬十餘名賊遂不敢進城悉由葉縣邊境東走初五日僧格林沁追至葉縣與臣會商剿辦張曜湯聘珍等各軍步隊亦於是日趕到初六日僧格林沁進軍襄城是晚探得賊匪距城東北十餘里密派陳國瑞選帶奮勇乘夜冒雪前進斬殺賊匪數百名焚死不計其數生擒五百餘名見聞該逆向西北禹州一帶狂奔僧格林沁進軍剿擊臣飛飭豫軍各步隊卽日會合大軍盡力痛剿惟查該逆見在騎多於步飄忽異常所慮被剿之後回竄蒙亳臣一面函屬喬松年派兵皖省邊境賊如回竄乘其驚魂未定出而迎擊毋令喘息臣俟確探賊蹤何處喫重卽當剋日移營相機策應上諭議政王軍機大臣等僧格林沁已

抵尉氏前經諭令督飭馬步隊前截後追就地殄除見在賊蹤已至何處連日進剿情形若何著僧格林沁張之萬隨時奏報並著懍遵前旨激勵各軍令陳國瑞張曜等分投邀擊仍檄催詹啟綸成大吉等各軍到營會合兜擊毋再任其延蔓張之萬摺內所稱確探賊蹤何處喫重卽當剋日移營策應刻下賊氛距汴梁甚近該撫自當趕緊前進力顧根本著遵照二十一日寄諭安速會籌滅賊之方以副委任中州地方徵兵籌餉力所能逮頗足自強該撫身任封圻務宜振刷精神肅清殘寇儻徒事尾追毫無布置或任令紛竄完善地方恐該撫不能當此重咎也直隸山東安徽等省前已諭令各該督撫早爲備豫如匪蹤向何路奔突仍當飛速知照並派兵出境會擊毋得稍分畛域將此由六百里各諭令知之○諭林鴻年奏候餉無期敬陳管見一摺前據該撫奏稱曲靖

地方業已就撫逆回馬聯陞伏誅馬榮就擒迤東軍務尙爲得手當經諭令駱秉章體察情形騰出唐友耕劉嶽昭兩軍入滇並籌銀數萬兩交林鴻年爲勦辦經費諒該督撫等早已接奉此旨駱秉章見雖因病避風未卽與林鴻年會晤籌議該督素顧大局當能不分畛域悉心商辦諒不至引嫌退讓貽誤事機著駱秉章懷遵前旨體察川省見在形勢如唐友耕所部可以騰出赴滇卽飭令該提督迅速前進並籌餉銀數萬交林鴻年帶往以利軍行林鴻年仍當隨時籌畫如機事可乘卽遵前旨進紮東昭督飭楊盛宗精選兵練聯絡聲勢以圖節節進取毋得藉口兵餉未裕遷延歲月致蹈賈洪詔覆轍滇省軍務方殷事權尤貴統一勞崇光見在未能離黔將來林鴻年進駐東昭以後遇將弁徵調有應權宜督辦之件卽著一面咨明勞崇光一面妥爲調派該督撫總當和

衷共濟以期於事有裨劉嶽昭一軍亟須抽調赴滇見因黔省賊蹤紛擾黔西定番失守後大定府旋陷遵義府勢亦危急黃白號匪竄近川南之永甯川東之綦江等境劉嶽昭所部各軍分防川東各邊隘一時未能檄調必須將黔省毗境賊匪先事剿除始能抽赴滇省勞崇光見駐黔省責無旁貸著卽會同張亮基檄飭在黔諸軍會合劉嶽昭之軍實力勦洗迅復黔西等城如黔省軍務不能速了致有蔓延句結惟勞崇光等是問前經諭令惲世臨俟江楚邊防靜謐卽飭趙煥聯率所部由黔入滇見在該臬司能否馳赴黔楚邊界會剿黔匪並著勞崇光張亮基林鴻年咨商惲世臨妥籌迅調林鴻年請於四川廣東湖南外復在湖北山西兩省派員勸辦捐輸著咨明各該省督撫飭地方官會同委員體察情形妥爲辦理至所請令各省滇籍官商勸辦捐餉並覈實舉劾員

弁寬爲隨帶人員各條均著照所擬分別妥辦將此由六百里各諭令知之○以故睿僖親王仁壽子德長襲爵○于安徽陣亡訓導朱彥昇祭葬世職建祠○撥直隸旗租山東地丁銀各六萬兩河南山西地丁銀各四萬兩解赴伊犁充餉○壬戌諭內閣前因御史賈鐸奏參湖南巡撫惲世臨等貪劣各款當經諭令胡家玉張晉祺前往查辦茲據胡家玉等查明具奏此案惲世臨被參各款如聽信婦人收受贓私由賣花婆出入通信並無確據亦無張昆祁招權納賄情事湖南委署章程本有代理之員非由該撫另添名目張希仲欠解錢糧實係自行補解其餘董紹昌回湖北時並無提款贈送椿齡稟計毛鴻賓等一案與惲世臨無涉其覈減軍械價值尙非侵蝕至信用胡鏞黃冕爲腹心事無證據亦並無私改釐局帳簿之事惟於勞銘勳未開巡檢之缺遽委代理臨湘

縣事究屬違例濫委胡崧係例應回避之員隱匿不報該撫毫無聞見兩次委署縣缺又於鹽釐兩局解銀加補火耗銀兩任用同鄉張昆祁令其密查州縣劣蹟致招物議且該撫前在常德府任內加抽鹽釐並不上詳擅自興辦已屬任意妄爲迫在藩司任內始稟請巡撫批准立案並請派員會算尤爲有心掩飾以上各節均有應得之咎憚世臨著交部嚴加議處毛鴻賓在湖南巡撫任內於勞銘勳胡崧兩案漫無覺察並於道員胡鏞請咨赴部引見輒令繳回原咨委辦稅務委署道缺辦理殊多乖謬毛鴻賓著交部議處候補道胡鏞前在澧州任內於失守情形任意捏飾且聲名亦甚平常著卽行革職以示懲儆知縣胡崧例應回避胞兄輒敢匿不呈報蒙混得缺實爲取巧著交部議處知縣張昆祁不知檢束才具亦難勝民社著革去知縣以府經歷縣丞改歸湖北補

用前任雲南巡東道黃冕業已開缺著毋庸管理東征局事務尋吏部議上憚世臨降四級調用毛鴻賓降一級調用胡崧降二級調用均私罪不准抵銷從之○諭議政王軍機大臣等胡家玉等奏遵查毛鴻賓被參收納部民之女一款傳到毛鴻賓在湖南巡撫任內巡捕李炳耀舒元凱張玉恩隔別嚴訊均供有毛撫院管帳師爺李文藻買一張姓婢女由撫署東花園便門而進等語復又傳到當日說合之陳品文據供張泰運婢女賣與撫署李師爺議定身價銀一百五十兩契寫張金鑑堂婢女賣與李蔭穀堂爲親並非爲婢傳訊張泰運則堅稱契寫爲婢並非爲親等語張玉恩李炳耀均稱有李師爺買來時送與毛撫院不受之說此案前經已革巡檢李際晟在京呈控知府李逢春知縣楊鼎勳合買一妾送與毛巡撫等情李際晟見在湖北李逢春前經官文奏參提

解楊鼎勳及江肇成張玉恩亦經檄調赴鄂歸案審辦所有毛鴻賓被參行賄納妾兩案請仍由官文提訊各等語毛鴻賓納妾各情既經李際晟呈控有案必須與李逢春質訊明確方足以折服其心且楊鼎勳及江肇成張玉恩均係案內要證見經赴鄂歸案著官文按照胡家玉等所奏各情提集全案人證確切訊明以成信讞毋稍徇隱胡家玉等片著鈔給閱看將此諭令知之○復浙江杭州殉難在籍已革員外郎邵懿辰原官予祭葬世職入祀昭忠祠○癸亥諭內閣御史譚鍾麟奏請申明保送御史定例一摺據稱近來各衙門保送滿漢御史但計資俸循例咨送不辨淑慝遂致言路龐雜請飭各部院衙門申明定例嗣後須擇品端守潔之員保送儻保送非人將原保堂官議處等語科道爲朝廷耳目之官職司彈劾凡臣寮之賢否政事之得失民間之利弊隨事敷

陳以通壅蔽責任綦重非洞達治體砥礪廉隅之員不克勝任前
年曾經明降諭旨令各該衙門堂官保送滿洲御史認真考試選
擇以期得人方今言路宏開凡在廷滿漢言官果能剴切指陳有
裨政治無不立加採納近年以來從臺諫中擢用者頗不乏人卽
有毛舉細故不諳政體者亦未嘗過事苛求惟招權納賄顛倒是
非散法營私之員實爲臺諫中敗類不得不執法嚴懲以肅綱紀
第整飭於敗露之後不若慎重於保送之先譚鍾麟所奏不爲無
見嗣後各衙門保送滿漢御史務須遵照前旨選擇才具開展人
品端方者保送候簡毋得濫竽充數如保送御史後犯有貪污劣
蹟所有原保之堂官應如何查照例保處分議處之處著吏部議
奏○諭議政王軍機大臣等有人奏藩司大員聲名狼藉請飭查
辦一摺據稱湖北藩司厲雲官巧於逢迎升任藩司後於糧臺事

務概存推諉營官彭楚漢等來鄂結算餉帳該藩司概不允見以致遣勇久停境內幾釀事端又於勸辦官捐勒索解費每百兩派銀六兩而呈開清摺與實收大相懸殊約計官捐十萬侵蝕尾數解費不下萬餘金各州縣均有印札實收可查每遇委缺未挂牌之前外間卽豫知某缺某人近聞有人送銀五百二十兩委署沔陽州同一缺聞外議沸騰撤牌另委該藩司信任家人私用關防運米販賣經前撫臣胡林翼查明懲辦在案近又任用家丁楊萃亭招權納賄有小藩司之目查該藩司前在清泉縣任內丁憂奏畱辦理糧臺咸豐六年又在軍營丁艱以經手事件未完畱省見在原籍肅清未聞該藩司呈請回籍補行穿孝貪戀升階罔識倫紀爲清議所不容懇請密飭查辦以肅政紀等語藩司總司會計表率官常自應潔已秉公整躬率屬方於地方有裨若如所奏種

種劣蹟實屬忝竊名位有玷官箴著官文吳昌壽按照所參各款
確切查明據實具奏官文久任鄂省務當破除情面認真查辦不
得以曾經出考在前意存回護吳昌壽到任未久無所用其回護
卽著會同該督密速查參毋得稍有徇隱原摺著鈔給閱看將此
諭令知之○諭保恆惠慶奏逆回上竄濟木薩古城漢營相繼失
守滿城危急都司鍾齡等臨陣脫逃坐視不救扎克當阿伯錫爾
奏古城被圍請派員就近赴援各摺片古城滿城存兵僅六百餘
人布置實嫌單薄保恆惠慶能於回眾攻撲之際嬰城固守實屬
可嘉仍著激勵兵民同心守禦以待援兵扎克當阿等見已咨令
色普詩新統帶木壘河戶民前往古城救援該戶民等情願自備
糧草迎擊賊匪洵屬深明大義色普詩新於古城地理人情旣所
深悉著卽星速前進先解古城滿城之圍再與保恆惠慶妥籌攻

勦扎克當阿等復派章京達薩杭阿等赴巴里坤招集民勇七八百名並派護衛蘇皮蓋帶領回兵五十名作爲後路策應所籌尙妥惟兵力究嫌單弱哈密回兵前次屢經擊退逆匪甚爲得力著扎克當阿伯錫爾再行添派回兵數百名派員管帶隨同色普詩新節節西勦以資接應色普詩新起程後巴里坤地方卽著責成伊勒屯與護理總兵何瑄嚴密防守毋稍疏虞其哈密城守並著扎克當阿伯錫爾妥籌防範以保完善前因古城道路梗阻賊匪有窺伺科布多之意諭令明誼等將解到餉銀暫存烏里雅蘇台咨令各城提用見在古城危急萬分若不設法接濟安能久守色普詩新帶兵應援兵糧亦刻不容緩著明誼麟興車林敦多布廣鳳奎昌迅卽探明道路將解到之餉酌撥數萬兩派員護送一面飛咨恆保色普詩新扎克當阿等設法迎提藉資軍食四川前撥

之新疆餉銀仍著歸秉章迅速籌解取道甘省由嘉峪關徑達哈密以濟急需恩麟遂派員弁兵勇沿途護送飭令刻期出關毋稍遲滯保恆所參都司鍾麟知縣文光裕厚縣丞陶珩知州孔昭恆帶兵防守未經接仗先自潰散鍾麟逃奔到古旋卽出城北遁文光等經保恆惠慶札調置若罔聞當此軍情緊急之時該都司等退縮逃遁坐視不救實出情理之外著保恆惠慶卽將該員等分別正法治罪以昭炯戒穆圖善前已屢諭帶兵出關見在古城一帶賊氛日熾待援孔亟著都興阿卽行知照穆圖善懷遵前旨迅帶所部前赴哈密與扎克當阿伯錫爾籌商進剿不得稍有遲誤將此由六百里諭知都興阿穆圖善駱秉章保恆明誼麟興車林敦多布廣鳳奎昌惠慶色普詩新扎克當阿伯錫並傳諭恩麟知之○甲子諭內閣前因吏部奏遵議袁保恆處分又據御史張觀

鈞奏袁保恆應照無言責官員妄行具奏降二級本例議處該部
舍重從輕與例不符當降旨令吏部查照該御史所陳各條將所
議袁保恆處分是否允協再行詳細覈奏茲據吏部奏稱查定例
無言責官員將公事妄行具奏者降二級調用公罪又官員妄行
條奏降一級調用公罪袁保恆前任庶子係正五品京堂非無言
責之官可比且上年條陳屯田事宜業經交皖豫督撫會議與無
言責而妄陳公事者更屬不同惟該員所陳事件雖係因公而以
丁憂在籍之員擅發摺報實屬冒昧是以將袁保恆比照官員妄
行條奏例議以降一級調用可否准其抵銷請旨遵行張觀鈞請
照無言責官員妄行具奏例議處嚴與案情未合等語袁保恆以
丁憂人員擅發摺報並有躬詣京師與廷臣籌商定議之語冒昧
從事殊屬不合著照吏部原議降一級調用不准抵銷○諭議政

王軍機大臣等雷正綰奏分籌雕剿逆巢並竄逆突入陝疆見飭截剿一摺會甯郭家驛馬賊經官軍堵截獲勝後分爲兩股一股南奔張家川越蓮花城折回會甯老巢一股由隴州竄入陝境飄忽異常前據劉蓉等奏該逆勾結潰勇已竄及醴泉雷正綰所派雷恆等軍適成尾追之勢陝省防兵較單劉蓉見將新募豫勇過陝之參將段登雲等畱紮興平以顧西安門戶仍著雷正綰檄飭余萬明雷恆兩軍星馳截剿探明賊竄何處迅卽繞出賊前會同陝省各軍實力兜截務將此股竄匪就地殄除淨盡毋任旁竄劉蓉當就見有兵力妥籌會剿不得稍涉鬆懈甘省悍賊麇聚固原經曹克忠從靜甯夾擊其勢已蹙著雷正綰會同曹克忠穩慎進攻先行雕剿蕭河城彰義堡逆巢以孤賊勢卽可規復固原州城盡殲醜黨毋任匪蹤續竄陝疆另片奏逆回假冒官弁見飭嚴防

等語據擒獲僞元帥耿懷民供稱賊中尙有鳳翔投匪勇丁二三百名每出冒充官軍見竄岐山縣境內著雷正綰劉蓉通飭各屬一體認真按剿實力盤查防禦毋墮狡謀並由雷正綰確切查明此項逃勇是否卽係投誠復叛之蔡華富等抑係回逆冒充迅卽據實具奏蔡華富著先行革職仍一面嚴緝務獲查明如果屬實卽行正法蔡華富所管勇丁著雷正綰札調赴營妥爲安插以免別滋事端將此由六百里各諭令知之○諭勞崇光張亮基奏定番州城被陷旋復並擊退羅斛竄匪及髮匪回竄古州廳屬地方請催湘粵兩省撥兵會剿各摺黔省軍務甚急城外賊匪縱橫肆擾黔西定番失守後大定府亦陷遵義勢亦甚危黃白號匪已竄近川南之永甯川東之綦江南川彭水涪州各邊境此等情形朝廷早有所聞本日據該督撫所奏僅將黔西定番失守情形入告

其餘軍務概未言及著勞崇光張亮基卽將各路軍情賊情迅速
奏聞並令派出兵弁將黔西迅籌克復大定遵義必須早爲綏靖
方可與川省通氣著懷遵二十五日寄諭檄飭諸軍與劉嶽昭之
軍實力勦洗不得含胡粉飾再致貽誤定番已失旋復善後事宜
務當飭地方文武妥爲辦理羅斛賊匪雖經擊退仍當嚴防竄突
以免滋擾前據張凱嵩奏李七帶其死黨在黔匪羅沈冥處其頭
目胡性聰等紮丙梅高增等處與苗匪聲勢聯絡見由三峒竹坪
竄去距黎平甚近當經諭令惲世臨張凱嵩派兵會合黔軍夾擊
茲據勞崇光等奏高增竄匪窺伺黎平經署知府徐邦達等率兵
練擊敗該匪回奔永從縣屬小黃地方又經官軍擊走後起髮匪
數千復由三腳壘竄入古州廳屬盤踞蜡子寨地方展轉會合黨
與日增屢攻未下逆首李七仍在都勻府屬苗寨中踞伏全祖凱

屢次按勦尙未將該逆首斬獲此股髮匪前經楚粵黔各軍會勦已成釜魚檻獸不難卽日殄除嗣以楚粵兩軍先後撤退該逆餘燼復然儻任其出沒黎古一帶與齋苗各匪互爲勾結貽患將何底止著勞崇光張亮基督飭古州文武厚集兵練嚴密堵禦俟楚粵兵到合力痛勦以靖巖疆惴世臨卽飭周洪印張凱嵩卽飭楊廷桂各統勁旅星馳赴古州會同黔師認真勦洗此股匪眾悉除於三省邊防可以一勞永逸該撫等斷不可稍分畛域方爲妥善全祖凱一軍責令將李七一犯嚴密購拏毋任漏網另片奏包茅仙之弟與包茅仙酷肖未知果否正身前奉出力獎敘恩旨暫緩宣示等語著該督撫確切查明包茅仙一犯是否頂名冒替其正兇究竟潛匿何處飭屬根究毋稍含混如包茅仙竟致免脫仍須設法購拏以絕後患前奉諭旨一道著暫爲收存無庸宣示如有

虛僞卽奏請撤銷以昭覈實另片奏請將沈宏富調赴他省剿賊等語沈宏富旣與黔中紳民不協而其打仗又素出力著勞崇光張亮基卽飭沈宏富前赴曾國藩軍營聽候調遣該督撫卽飭該總兵迅速起程毋稍延緩將此由六百里各諭令知之○諭勞崇光等奏雲南昭通鎮總兵沈宏富在黔剿賊尙屬勇敢惟因餉糈兩絀取軍未能整齊致紳民不無怨謗且與黔省各鎮將亦未能和衷請將該員調赴他省剿賊等語沈宏富疊經被人參劾前已有旨令其毋庸署理貴州提督該員帶兵旣致紳民怨謗又與黔省鎮將積不相能且黔省將弁積慣驕恣卽調赴他省豈能望其得力本日已諭令勞崇光等飭令前赴曾國藩軍營著曾國藩於該員到營後妥爲察看如實係暴戾恣睢不堪造就卽著該大臣奏明罷斥如其材尙有可用僅於黔省人地未宜卽著於婁雲慶

等軍出關時令該總兵同赴鮑超軍營交該提督驅策駕馭帶赴
新疆勦賊以觀後效將此諭令知之○諭各省世職呈報承襲嚴
禁書吏需索並命兵部嚴定申詳限期○予貴州殉難署知州李
蔚然祭葬世職建祠署都司謝勳安吏目和錫等附祀○乙丑諭
內閣前據降調通政使司通政使王拯奏參安徽巡撫喬松年請
飭曾國藩察看當經諭令曾國藩據實具奏嗣據覆奏喬松年門
丁常杏洲捐納官階迹涉招搖後還本姓名曰楊樹當降旨將楊
樹卽常杏洲斥革並諭令喬松年將其驅逐出境不准在署逗留
茲據喬松年奏稱查明楊樹係原任江南提督楊捷之後因應募
爲書手變姓名爲常杏洲該撫曾雇令繕錄文件並未充當門丁
後仍用原名加捐官職並准部覆承襲楊捷輕車都尉世職今旣
經指參奉旨斥革業將楊樹逐令回籍不准逗留其所襲世職懇

恩另揀合例人員承襲等語楊澍既係楊捷之後應募備書亦非賤役何以輒更易姓名致招物議且據曾國藩查有招搖情事予以斥革實屬咎有應得惟原任提督楊捷於康熙年間曾著勳績功臣後裔自應仍畱世職以示矜全楊澍所捐之同知銜知縣著一併斥革其所襲楊捷之輕車都尉世職著兵部查明如實係應行承襲該部覆准有案卽著毋庸斥革○僧格林沁國瑞奏逆眾由尉氏縣西折向東南竄逸在雙溪河一帶盤旋正月十八日督飭翼長常星阿等各軍跟蹤前進行至雙溪河地方偵知逆眾麇聚於河南一帶村莊隨令翼長成保等各帶馬隊過河探剿賊見官軍猝至紛紛竄走經官軍掩殺斃賊甚多馬步各隊陸續過河偪賊而壘詎馬步援賊全股傾巢出撲當經翼長諾林丕勒等各帶馬隊更番衝壓斃賊多名逆眾拚命很關抵死不退復有另股

馬賊圖鈔我軍之後諾林丕勒等趕緊帶隊由閒道折回扼住橋口開槍堵擊斃匪多名餘匪始退是時郭寶昌等槍紮營壘已定堪以固守且因我軍馬隊疲乏未便窮追遂卽收隊臣等暫紮鄂陵略加整頓卽當覘賊所向相機進取查此股髮捻賊匪疊經我軍痛剿步賊業已無多而馬賊尙有千餘名俱係皖豫積年巨捻非有强健騎兵不足制賊死命以臣等見統馬隊而論自上年入夏以來先後在營病故及陸續傷亡者已近千名此時能出隊打仗者不過千名其楚軍常星阿等所帶四起馬隊雖有千餘名內除受傷患病及無馬官兵外其堪以隨隊打仗者亦僅三百名合之臣等馬隊追擊此股賊匪已屬僅敷剿辦若撥楚軍赴甘不惟兵分力單於事無濟且恐各股賊匪剿辦均難迅速見在賊勢復向南趨仍在豫境臨潁縣南一帶正宜厚集兵力迅將此股窮寇

就地殄滅以期先清肘腋之患一俟賊氛稍靖卽當揀調馬隊飭交常星阿等管帶馬隊前往甘省助剿俾資得力至臣等軍營馬匹見在殘傷疲乏者過半實屬不敷應用必須酌量添補此時若調口外捐輸馬匹又值青黃不接到營恐不堪用擬卽派員前往河北一帶採買以資騎用而利進剿上諭議政王軍機大臣等逆眾由尉氏縣西折向東南竄逸在雙溪河一帶盤旋僧格林沁派令成保等過河掩襲賊眾敗退見在臨潁縣南一帶該親王以馬隊疲乏擬暫紮鄆陵略加整頓再行相機進取所籌極合機宜賊以捨命狂奔疲我馬力我軍馬力旣形疲敝且爲數不過一千三百餘名必須養足全力俟各路馬步到齊然後足以制賊死命斷不可因急於滅賊銳意直前致有輕進之失馬匹不敷應用卽照所請在河北地方採買以供驅策至調赴甘肅之馬隊此時旣

不能分撥著俟此股賊匪全行撲滅豫境肅清再行派往該逆計無復之四散奔突若回竄魯南或由鄭汝以入嵩洛均屬不了之局張之萬見在是否仍在葉縣著督率所部實力截剿並嚴飭所屬地方督率兵團扼要堵截不得恃有僧格林沁在豫遂任賊到處狂竄蔓延完善黃秉忠史念祖二軍前有旨令無庸赴豫茲據喬松年奏黃秉忠一軍業已成行著即催令迅赴豫營歸僧格林沁調遣並著僧格林沁催提此軍到後妥爲調派楚省見無賊蹤所有成大吉等軍著官文迅飭前赴僧格林沁軍營聽候調遣其詹啟綸一軍業已起程並著該大臣迎提以資得力潁州一帶防務喬松年當督飭英翰妥籌辦理其成大吉等軍赴豫後楚省邊防亦須安設重兵著官文妥籌辦理毋稍疏虞將此由六百里各諭令知之○諭恩麟等奏登昌戒嚴平番危急請飭都興阿曹克

忠分兵會剿一招鞏昌逃回糾約鹽關等處殘匪及洮岷河狄回民肆擾隴西之何家溝等處並直隸郡城經官軍擊退見仍在距城四五里屯聚其米拉溝回匪勾結撤回紛擾平番縣屬之苦水堡等處縣城被圍危急萬分恩麟見派軍分防苦水堡秦王川以保省城糧路並將都興阿派令防省之道員黎獻暫畱平番由甘涼撥兵千名及石成器部勇五百名統歸黎獻調遣著卽催令各軍飛速前進迅解城圍穆圖善疊經有旨催令出關都興阿偪攻甯夏兵力無多勢難遠顧平番之急著恩麟卽就見有兵力責成黎獻力籌剿洗陶茂林進攻靖遠如已得手並著分兵兼顧恩麟請撥黎獻舊部一千名赴平之處著都興阿斟酌情形能否分援妥籌調派鞏昌之賊該護督擬請騰出曹克忠一軍專力勦辦曹克忠見同雷正綰會剿蕭河城彰義堡之賊規復固原軍情萬難

鬆勁仍著該護督飭令趙桂芳招原部勇丁二千餘名力籌堵遏一面分兵兼顧一面嚴防省城恩麟身任地方責無旁貸試問該護督自受事以來究竟肅清何路剿平何股賊匪聞警莫展一籌明知各路兵力難分徒以呼籲塞責若再毫無布置專待客兵致令地方日遭蹂躪該護督恐不能當此重咎也將此由六百里諭知都興阿並傳諭陶茂林恩麟知之○諭毛鴻賓等奏官軍越境剿賊克復永定縣城一摺逆首丁汰洋潘姓踞守永定與漳州之賊互相犄角經方耀等疊次猛攻將該逆城外礮樓土壘平毀官軍倚山紮營日夜俯擊城賊由東門向龍巖州竄逸我軍追至雷塘而還剿辦尙爲得手永定業經收復漳州逆勢自孤著毛鴻賓郭嵩燾督飭方耀等軍乘勝進攻聽候左宗棠調派並著左宗棠飭令閩浙官軍會合夾擊節節掃蕩次第規復各城以收破竹之

效濂逆汪海洋盤踞汀州南陽號稱十餘萬人漳州踞逆號稱二十萬人逆餒尙肆鴟張潮嘉東北兩路防務尙未可稍鬆前經諭令馮子材暫畱本藉督辦軍務卽著毛鴻賓郭嵩燾催令該提督迅速前赴東江妥籌守禦並飭令李福泰速赴潮州府城嚴密布置以固門戶不可稍涉疏虞致令賊匪再行回竄將此由六百里各諭令知之○丙寅諭議政王軍機大臣等楊岳斌奏遵旨趕緊募勇並籌撥各省協餉情形一摺甘省餉需奇絀都興阿等軍見有兵勇已不能按月給餉將來楊岳斌募勇赴甘並益以蔣凝學金國琛李鶴章等三軍共計二萬餘人其支絀情形更可想見若不早爲籌畫深恐停兵待餉貽誤事機見在東南數省漸次蕩平商賈百貨日見流通湖北江蘇等省又陸續裁撤兵勇以節餉需此後各該省所收釐金自可稍爲寬裕著官文曾國藩駱秉章毛

鴻賓沈葆楨吳昌壽憚世臨馬新貽李鴻章

該省每月鹽釐項下分撥三成百貨釐金項下亦每月分撥三成接濟楊岳斌軍餉並著楊岳斌派員徑赴各省按月提解慶陽糧臺以應急需該督撫等務當不分畛域極力設法共濟時艱不得稍存推諉之見致負委任楊岳斌另片奏甘省逆黨多踞堡寨非用火器不能催堅及遠請飭李鶴章迅速赴甘並撥給開花炸礮等語著李鴻章飭令李鶴章速帶所部赴甘助剿該軍行糧並著李鴻章寬爲籌備以利師行至炸礮一項向稱得力能否運往著李鴻章斟酌辦理如果難於運往卽著揀選精於製造火器之人飭令酌帶工匠前赴楊岳斌軍營隨時製造以資利用皖南鎮總兵唐義訓前經楊岳斌奏調赴甘茲據楊岳斌奏稱該總兵見因宿疾未愈懇請賞假回籍免其從軍西征等語唐義訓旣稱舊疾

復發著毋庸調赴甘省惟皖南重鎮豈可懸缺待人著曾國藩查明唐義訓病勢難痊卽行奏令開缺請旨另行簡放以重職守將此由五百里各諭令知之○江蘇巡撫李鴻章奏遵查前收復溧陽獲粵逆李侍賢之母何氏姊李氏先後身死妻金氏係被擄之婦遣回原籍其胞兄嫡妻已於克復金陵時被戮無可根究報聞○予江蘇殉難道員徐佩瑗祭葬世職○是月豁免直隸安州等三州縣積滂上年額賦並緩新舊糧租暨民借倉穀江蘇金壇等五縣被擾本年來年額賦蠲免安徽廣德等五十九州縣安慶等九衛被擾新舊額賦雜課減免兩浙袁浦等五場被擾上年竈課緩徵直隸開州等三十六州縣水旱雹災新舊額賦雜課浙江餘姚等五縣暨石堰場被旱被擾額賦竈課蠲緩山東濟甯等三十六州縣暨東昌等三衛被水被旱被雹被蟲本年上忙額賦雜課